

## **Guan Eng gesa Najib perlu arah Umno P. Pinang kembalikan RM5 juta kepada rakyat**

**Malaysian Insider**

**24 Julai, 2012**

**Oleh Mohd Farhan Darwis**

KUALA LUMPUR, 24 Julai — Ketua Menteri Pulau Pinang, Lim Guan Eng hari ini menggesa Perdana Menteri, Datuk Seri Najib Razak supaya mengarahkan pemimpin Umno dan Barisan Nasional (BN) Pulau Pinang untuk segera memulangkan kembali keuntungan mereka dalam penjualan tanah milik Melayu di negeri terbabit.

Lim dalam satu kenyataan hari ini menjelaskan, Najib perlu mengarahkan Timbalan Pengerusi Umno negeri berkenaan, Datuk Musa Sheikh Fadzir dan Pengarah Pilihan Raya BN negeri itu Datuk Omar Faudzar supaya memulangkan sejumlah RM5 juta yang diperolehi mereka yang bertindak selaku "broker" dalam urusan jual beli tanah melibatkan 31 pemilik tanah Melayu di Kampung Terang, Balik Pulau, Pulau Pinang.

"Walaupun tindakan kedua-dua pemimpin Umno ini tidaklah haram, tindakan mereka sebagai broker tanah untuk menjual tanah Melayu untuk keuntungan peribadi yang sepatutnya dimiliki pemilik tanah Melayu adalah tidak bermoral dan tidak berprinsip, kata Lim dan menambah,"apatah lagi apabila mereka mendakwa kononnya mempertahankan hak tanah Melayu."

Menurut kenyataannya, Setiausaha Agung DAP itu menjelaskan, kedua-dua pemimpin berkenaan telah beroleh keuntungan melampau sehingga 57 peratus hanya dalam masa tiga bulan setengah apabila menjadi broker untuk jual beli tanah antara penduduk kampung dengan Kay Pride Sdn Bhd apabila melalui syarikat milik mereka Maison Heights Sdn Bhd.

"Tanah dipindah milik daripada 31 pemilik tanah Melayu kepada Maison Heights Sdn Bhd pada 31 Januari lalu dengan jumlah harga RM8.6 juta ... Maison Heights kemudiannya telah menjual tanah tersebut kepada Kay Pride Sdn Bhd pada 16 Mei 2012 dengan harga RM13.5 juta.

"Adakah ini caranya pemimpin Umno mempertahankan hak Melayu? ... dengan mengaut keuntungan yang sepatutnya dimiliki orang Melayu biasa?" tegasnya lagi.

Lim turut menegaskan, beliau juga masih lagi menantikan jawapan daripada kedua-dua pemimpin Umno itu bagaimana "keuntungan bernilai RM5 juta itu boleh membawa manfaat kepada pemilik tanah Melayu tersebut."

Jelas pemimpin DAP ini lagi, Najib juga perlu tampil untuk kredibiliti Umno dengan mengarahkan kedua-dua pemimpin itu untuk memulangkan keuntungan RM5 juta yang diperolehi kepada 31 pemilik tanah Melayu.

"Jika mereka adalah broker tanah yang tulen, mereka berhak untuk mendapat komisyen pada kadar pasaran iaitu 2 peratus ataupun RM270,000 dan bukan RM5 juta ataupun kadar komisyen 57 peratus!"

Pendedahan skandal pencatutan tanah oleh pemimpin Umno ini juga jelas Lim "membuktikan kemunafikan Umno yang mewartakan mereka adalah pejuang hak Melayu tetapi sebenarnya merupakan penggadaikan hak mereka."

"Ini jelas membuktikan, bukan kerajaan Pakatan Rakyat (PR), tetapi Umno sendiri yang telah menggadaikan tanah Melayu."

Hakcipta © 2012 The Malaysian Insider

Source:

<http://www.themalaysianinsider.com/bahasa/article/guan-eng-najib-perlu-arah-umno-p.pinang-kembalikan-rm-5-juta-kepada-rakyat/>

